

Zwergalserin

Rundbrief für Kinder







Summa is, wenns Weda gibt!

Aba wia entstäht so a Gwidda
überhaupts und auf wos muasst
aufbassn, wenn oans kimmt. Dodrüba
untahoidn se da Schnuffi Mankei, de
Imp und da Leo Löwe.

Kuaz zammagfasst aba schomoi: Angst
brauchst koane hobn. Aa wenns ganz
schee kracha ko.

„Schnäj! Außa ausm Wossa! Do kimmt
a Gwidda!“

„Mei Imp, wos machstn fia an Stress? Is
doch grad so gmiatlich.“

Ja woäßt du denn des ned Leo? Wenns
a Gwidda gibt, dann muass ma schaug,
dass ma raus kimmt ausm Wossa. Des
konn sonst lebensgefährlich werden.
Wega de Blitz und da Spannung und
des Wasser leit de Spannung doch
weida. Dann drifft di da Blitz.“

„Äha. Ja, is scho recht Imp. Dann aba
schnäj jetzat! Laff ma zum Kiosk und
stän uns unta.“

„I hob ma scho denkt, dass heid no wos kimmt, weils gar a so dampfig war.“

„Ja freilich. Wenn de Luft so warm is, dann steigt des Wossa aus de Seen, de Flöß und de Bäch an Himme auffe. De Sunn zuzelt des Wossa nauf.“

„Ja, dann miassats aba doch irgendwann renga. Des kannt ma dringend braucha. De Bauern san scho nervös, weil oiss so drucka is.“

„Leo, des duads dann aa. Aba zerscht wead aus dem Wossadampf a grouße Woikn. De wochst imma weida und aus dem Wossadampf wearn wieda Dropfa und dann wachsts no weida und aus de Dropfa wean Eiskristalle.“

„Wos??? Bei dera Hitz san in de Woikn Eiskristalle? Des kann i ja gar ned glaabn!“

„Doch Schnuffi. De Woikn is ja dann so weit obn im Himme und je weida obn, desto käida werds.“

„Ja, aba dann miassats ja schneibn.“

„Na, na. De Eiskristalle und de Wossadropfa bewegn se. So wia beim Autoscooter aufm Voiksfest stäßn de aber dauernd zamm und es bassiert des Gleiche, wie wenn i dir an Luftballon übern Bäitz reib.“



„Wos bassiertn do?“

„Probiern mas aus. Schaug, es knistert und britzelt. Es entsteht a elektrische Spannung. So is´ s in da Woikn aa, aba hoid vui, vui mehra.“

„Brrr, mia stäht da Bätz zu Berge!“

„Genau. De Spannung muass irgenwia raus. In da Woikn baut se sovui auf, dass a gscheider Blitz entsteht und der konn scho a gfährlich werdn.“



„Am sicherstn bist in am Auto. Des leitet den Blitz nämlich an der Metallhaut in dErdn eine und dir passiert nix, wennst drin sitzt. In am Haus is's aba aa sicher, vor allem, wenns an Blitzableiter hod. Stäi di bloß nia unta an Baam.“

„Ha, i woäß warum. Da Blitz suacht se imma des Hächste aus, in des er eischlogt.“

„Genau Schnuffi!“

„Vorm Blitz hob i koa Angst. Den schaug i mia sogar ganz gern o. Aba i daschreck mi imma so vorm Donna.“

„Stimmt. Muass der imma dabei sei?“ „Ja. Blitz und Donna kean zamm. Des miassts eich vorstän wia a ganz fest aufblosna Luftballon und dann sticht oana a Nodl nei. Der blatz und es schäbert gscheid.“

„Des mog i aa ned. Blatz do dann de Woikn.“



„So ähnlich. So a Blitz is ja wahnsinnig hoäß. 30000 Grod. Jetzt wenn der an de koidn Luftmassn in dera Woikn vorbeisaust, wead de koide Luft in a Sekundn sauhöäß und dehnt se aus. Des schäbat dann gscheid.“

„Mei Imp. Du bist so gscheid!“

„Dankschee, Leo und Schnuffi. Fia olle Gscheidhaferl hob i no a Adress. Do kinnts eich des ois nummoi ganz guad erklärt auf YouTube oschaung. Freilich nua, wenns Mama und Babba erlaubn.“

<https://youtu.de/soEEoLzvS48?is=GoQeYIC0hxuzwysq>



Pfiat eich, hobt´s a scheene Zeit und raus ausm Wossa, wenn a Gwidde kummt.

Eia Imp und da Leo und da Schnuffi

Die Geschichte zum Anhören gibt es auf unserer Webseite unter <https://fbsd.de/rundbriaf/>



Einfach QR Code scannen.

Herausgeber und Verleger:

Förderverein Bairische Sprache und Dialekte e.V.
Salzburger Str. 62a, 83435 Bad Reichenhall
Telefon: 08651-7680098
E-Mail: info@fbsd.de
Internet: www.fbsd.de

Bild, Grafik und Text:

Birgit Hackl, Baldham
Claudia Geisweid, Altomünster